

Fundacion Rancho

E celebracion di 5 aña ta sigui cu un proyecto yama “Tempo pa click”



ORANJESTAD – E elaboracion tocante e celebracion di 5 aña di fundacion Rancho ta sigui. Recientemente durante un conferencia di prensa, presidente Clifford Rosa a informa tocante mas actividad cu lo sigui tuma laga manera e proyecto yama “Tempo pa click”.

Mas trempa den e luna aki, tabata tin e evento di Sail Aruba. Sr. Rosa ta conta cu despues di e evento aki, a haci un exposicion di boto di bela na museo historico cu ta habri pa publico cu un duracion largo. Den e exposicion aki por admira botonan miniatura cu a forma parti di competencianan durante añanan largo y ta un tradicion di e barío Rancho pa masha tempo caba.

Tempo pa click

Pa nan sigui cu nan trabou cu nan ta haci, sr. Rosa ta conta cu nan lo bin cu dos ayudante di Canada cu lo duna nan un empuhe y lo comparti idea riba con por sigui mehora e barío aki.

Tambe nan a haya un persona cu ta core stage di Universidad di Aruba. Cu a tuma e proyecto aki den su man. Nan tur lo bin cu algo nobo y colectivo lo purba traha riba mehora e problematica cu tin den e barío, manera entre otro adictonan ambulante.

E proyecto yama “tempo pa click”, nan lo trece dilanti documentarionan unico cu ta mostra historia di e barío y kico ta locual ta haci e barío aki uno special riba su mes. Keyla Rojas cu ta estudiante di Universidad di Aruba, e ta conta cu e ta planeando e proyecto aki. E ta un proyecto di fotografia. E nomber “click” den e proyecto aki tin dos significativo. E prome ta cu esaki ta e zonido cu un camara ta haci ora di saca

potret. Y e di dos, e click ta un cambio den pensamiento y reflexion di experencianan den pasado cu por yuda un hende cultiva su desaroyo personal.

3 grupo

E programa lo cuminsa den vakantie grandi y ta sigui te augustus. Lo tin un grupo di mucha, di teenager y adulto. Na ultimo lo tene un exhibicion unda cu tur e proyectonan cu wordo saca durante e programa lo wordo exponi. E participantenan lo ta uzando dos tipo di camara. Segun sra. Rojas e personanan cu ta bin di Canada tambe tin experencia den fotografia y lo ta yudando nan cu e programa aki tambe. E muchanan lo uza e camaranan “point and shoot”, pa cultiva e arte sacamento di potret y haya un bon comprension di esaki. E adultonan lo ta trahando cu un camara Nikon profesional.

E participantenan lo haya guia, cada grupo tin tayernan di dos siman largo. Cada grupo por tin 5 pa 6 participante. E programa aki ta pa muchanan y adultonan cu ta biba den Rancho. Nan ta cuminsa poco, poco mirando cu esaki ta e prome aña. Nan lo traha hunto cu Wit Gele Kruis, museo Arkeologico y Departamento Social. Nan ta den proceso di busca e participantenan. Y anochinan di documentarionan lo tuma laga prome cu e tayer mes, ya asina e participantenan tin un bon bista riba kico ta nan herencia cultura.

Laga Rancho

E problemanan social na Rancho, no ta nada desconoci. Den pasado Bon Dia Aruba a publica cu hopi hende ta mira nan mes forsa di laga nan barío pasobra nan no por wanta e situacion mas. Fundacion Rancho ta masha

preocupa pa e problematica di adictonan ambulante y otro problemanan cu tin den e barío aki, y cu ta afecta directamente nan habitantenan.

“Nos ta haya cu un poco di informacion di hendenan cu a nace y biba den Rancho cu lamentablemente ta bay laga Rancho, pasobra e cosnan aki a bira di mas. E problema di ambulante a bira asina increíblemente, cu nos tin hendenan cu awa na wowo ta bisa bo cu gewoon nan tin cu laga Rancho” sr. Rosa declara na Bon Dia Aruba, januari ultimo.

aunke sr. Rosa a laga sa cu e asunto aki no ta un funcion cu ta concerni directamente na e fundacion, ya cu nan tarea specifico ta pa promove historia y cultura di Rancho.



Nan tin e tarea di conserva e dos aspectonan anterior, pero mirando cu e problematica social entre otro di adictonan ambulante ta asina grandi, sr.

Rosa ta haya cu solamente un trabou den conhuntto ta e unico manera cu nan hunto como fundacion Rancho-ta mira solucion. □